

## Jisalimishe kwa Kristo

*Akawaambia wote, Mtu ye yote akitaka kunifuata, na ajikane mwenyewe, ajitwike msalaba wake kila siku, anifuata.—Luka 9:23.*

**N**i mara nyingi kiasi gani tunakutana na watu wasio na furaha kabisa. Wanashindwa kufurahia utoshelevu na amani ambayo Yesu anaitoa. Wanadai kuwa Wakristo, lakini hawatekelezi masharti ambayo kwayo ahadi ya Mungu inatimilizwa. Yesu alisema, “Njoni kwangu, ninyi nyote msumbukao na wenye kulemewa na mizigo, nami nitawapumzisha. Jitieni nira yangu, mjifunze kwangu; kwa kuwa mimi ni mpole na mnyenyekevu wa moyo; nanyi mtapata raha nafsiini mwenu; kwa maana nira yangu ni laini, na mzigo wangu ni mwepesi.” Sababu ya wengi kuwa katika hali ya wahaka ni kwamba hawajifunzi katika shule ya Mwalimu Mkuu. Mtoto wa Mungu mtiifu na anayejikana nafsi anafahamu kwa uzoefu ni nini maana ya kuwa na amani ya Yesu. Wafuasi wa kweli wa Yesu wanajua kwamba lazima wajitwike nira Yake, washiriki taabu Yake, na kubeba mzigo Wake. Lakini hawajisikii kulalamika; kwa kuwa upole na unyenyekevu wa Kristo hufanya nira kuwa laini mzigo kuwa mwepesi.

Ni upendo wa kufurahia ubinafsi, kupenda anasa, kujiona kwako na kujikweza, ndiko kunakokuzuia kujifunza mafundisho ya thamani maishani katika shule ya Kristo. Ni wajibu wa Mkristo kutoruhusu mazingira na hali halisi maishani kumfanyanga; bali kuishi juu ya mazingira yanayomzunguka, akitengeneza tabia yake kulingana na Mfano wa Mungu. Anapaswa kuwa mwaminifu mahali popote anapokuwa. Analazimika kutekeleza majukumu yake kwa uaminifu, akitumia vizuri zaidi fursa anazopewa na Mungu, akitumia kadiri awezavyo vipaji vyake. Huku akijikita katika utukufu wa Mungu, anapaswa kufanya kazi kwa ajili ya Yesu popote atakapokuwa. Tunalazimika kusalimisha dhamiri, mioyo kwa Mungu na kumfahamu vizuri Kristo. Lazima tujikane nafsi, tuuchukue msalaba na kumfuata Yesu. Hakuna hata mmoja wetu anayeweza kufika mbinguni, isipokuwa kwa njia nyembamba na kuubeba msalaba. Lakini ni wangapi wanaovaa msalaba kama pambo kwa mtu na kushindwa kuubeba msalaba kwa vitendo katika maisha ya kila siku.

Ni wangapi wanakiri kuwa watumishi wa Yesu; lakini wanachukizwa na kustahimili lawama na fedheha kwa ajili Yake. Msalaba sio kujifurahisha nafsi; unakatiza katikati kabisa ya njia ya mpenda anasa, na unakata matamania yetu ya kimwili na mielekeo ya ubinafsi....

Jambo muhimu kwa ajili ya mafanikio ya kazi ni ujuzi wa Kristo; kwa maana ujuzi huu hutatoa kanuni nzuri za haki, utatoa roho ya uungwana isiyo na ubinafsi, kama ile ya Mwokozi wetu ambaye tunakiri kumtumikia. Uaminifu, uchumi, utunzaji, utimilifu, vinapaswa kuwa sifa ya kazi yetu yote, popote tulipo, iwe jikoni, kwenye karakana, ... au popote tunapoweza kuwekwa katika shamba la mizabibu la Bwana (**The Review and Herald, Septemba 22, 1891**).